

USPJESI STUDENATA ODSJEKA ZA GEODEZIJU I GEOINFORMATIKU GRAĐEVINSKOG FAKULTETA U SARAJEVU NA 49. GRAĐEVINIJADI, 2023. GODINE

U organizaciji Studentskog parlamenta Državnog univerziteta u Novom Pazaru od 15. do 19. maja 2023. godine održana je 49. po redu studentska Građevinijada na Ohridskom jezeru u Sjevernoj Makedoniji.



Slika 1. Studenti Građevinskog fakulteta u Sarajevu pred polazak na Građevinijadu

Građevinijada je četverodnevno takmičenje studenata na nivou znanja iz oblasti građevinarstva i geodezije i različitih sportskih disciplina, podijeljenih u muške i ženske kategorije. Ovogodišnje izdanje manifestacije bilo je obogaćeno prisustvom novog učesnika, Univerziteta u Temišvaru, čime se broj učesničkih univerziteta popeo na 21, predstavljajući 8 različitih zemalja (Srbija, Hrvatska, Crna Gora, Makedonija, Bosna i Hercegovina, Slovenija, Bugarska i Rumunija). Ova Građevinijada se ističe kao najmasovnija dosada, s obzirom na broj zemalja učesnika.

Takmičenja iz znanja organizovana su u timskom formatu, gdje je svaki univerzitet za svaki predmet imao tim od tri studenta. Tim studenata koji je predstavljao Građevinski fakultet Sarajevo na kvizu iz predmeta Geodezija sačinjavali su: Tarik Šurković, Azra Šehić i Adem Bjelić koji su demonstrirali izuzetno znanje i predstavili Odsjek za geodeziju i geoinformatiku Građevinskog fakulteta u Sarajevu u najboljem svjetlu, osvojivši prvo mjesto u jakoj konkurenciji. S obzirom

na iznimno uspješnu prošlost na prethodnim Građevinijadama, jasno je da je kvaliteta studija na Odsjeku za geodeziju i geoinformatiku konstantno visoka, čime sebe i svoje studente postavlja u sam vrh regionalnih akademskih institucija.



Slika 2. Pobjednička ekipa (s lijeva na desno: Adem Bjelić, Azra Šehić i Tarik Šurković) sa medaljom za prvo mjesto na takmičenju znanja iz predmeta Geodezija

U ukupnom plasmanu Građevinski fakultet Sarajevo je zauzeo solidno 5. mjesto gdje je, pored uspjeha studenata geodezije i geoinformatike, najviše doprinijela muška rukometna ekipa koja se istaknula impozantnom igrom tokom takmičenja, dominirajući nad konkurencijom i ostvarujući sve pobjede sa značajnom gol-razlikom. Njihov izvrsni nastup nije nijednog trenutka dovodio u pitanje osvajanje prvog mjesta, što potvrđuje njihovu izuzetnu sportsku izvedbu. Među ostalim značajnim rezultatima izdvajaju se bronzane medalje u muškoj odbojci i takmičenju u znanju iz predmeta Saobraćajnice.

Ovim putem važno je istaći zahvalnost Građevinskom fakultetu u Sarajevu koji se istakao kao generalni sponzor pružanjem finansijske podrške svojim studentima, kao i ostalim sponzorima čija je podrška ključna za odlazak studenata na ovakvo regionalno takmičenje kako bi pokazali svoje znanje i sportske vještine. Također zahvale slijede svim profesoricama, profesorima, asistenticama i asistentima koji su pomogli u pripremama za Građevinijadu i pružili veliku podršku, te profesorima Nedimu Tuni i Jusufu Topoljaku koji su priredili svečani prijem osvajačima medalje i organizatorima učešća ekipe Građevinskog fakulteta u Sarajevu na Građevinijadi.



Slika 3. Prijem na Odsjeku za geodeziju i geoinformatiku

*Azamina Tucaković
Azra Hadžimejlić
Mirza Abaza*